

DISSERTATIO  
ANATOMICO-MEDICA  
INAUGURALIS

DE

H E P A T E.

QUAM,

ANNUENTE DEO TER OPT. MAX.

EX AUCTORITATE MAGNIFICI RECTORIS,

D. JACOBI WITTICHII,

A. L. M. PHIL. DOCTORIS, EJUSDEMQUE FACULTA-  
TIS, UT ET MATHESEOS, PROFESSORIS,

NEC NON

*Amplissimi SENATUS ACADEMICI Consensu,*

*& Nobilissimae FACULTATIS MEDICAE Decreto,*

PRO GRADU DOCTORATUS,

SUMMISQUE IN MEDICINA, HONORIBUS ET PRIVILEGIIS RITE  
AC LEGITIME CONSEQUENDIS,

PUBLICO AC SOLEMNI EXAMINI SUBMITTIT

PETRUS VINK, GORINCHEMENSIS.

*Ad diem 6. Octobris 1735. hora locoque solitis.*

---

LUGDUNI BATAVORUM,

Apud JOH. & HERM. VERBEEK, 1735.

# H E P A T E

OF THE LIVER

IN ITS SEVERAL AFFECTIONS

BY JACOB WITTE

OF THE UNIVERSITY OF GIESSEN

TRANSLATED BY

JOHN HOLT

OF THE UNIVERSITY OF GIESSEN

AND OF THE UNIVERSITY OF LEIPZIG

THE SECOND EDITION


REVISED BY THE AUTHOR

AND BY JOHN HOLT

OF THE UNIVERSITY OF GIESSEN

AND OF THE UNIVERSITY OF LEIPZIG

WITH A NEW PREFACE



LEIPZIG

JOHN F. SCHUBERT

*I L L U S T R I S S I M O*

*G R A V I S S I M O Q U E V I R O*

**D. ABRAHAMO VAN HOEY,**

ORDINUM PRÆPOTENTIUM SEPTEM FOEDERATA-  
RUM PROVINCIARUM APUD MAGNUM GALLIÆ  
REGEM LEGATO &c. &c. &c.

**S**I tantum mihi, VIR ILLUSTRISSIME, Natura Ingenii, Studium doctrinæ, Exercitatio politæ dictionis, Nobilitas morum suavium adferret, quantum adfert ad offerendum timoris nominis tui fama ac splendor, tenuitatis meæ conscientia, insitusque a natura pudor, vix vererer me ipsum, hæcque paucas pagellas illustri tuo nomini dicare; at si quid hæc ætas, quæ nondum adolescentiæ spatium est egressa, si quid hoc Judicium, quod nullo rerum usu est confirmatum, si quid hoc scriptum, quod nulla Styli suavitate est imbutum, valere debeat, profecto nihil sperare mihi licebit a viro, cujus Doctrinam si spectro, eruditissimum; si Usus, peritissimum; si Ingenium, perspicacissimum; si Conditionem, nobilissimum; si Famam, claratissimum comperio.

Haud commemorabo præclara tua merita, quibus nostram Patriam, dulce solum, tibi obstrictissimam reddidisti, & nomen in æternam memoriam sacraisti, nec id est virium nostrarum opus, nec generosus tuus animus fert.

A 2

Re-



## D E D I C A T I O.

Recreor ac Inficior non parum, cum recorder, VIR GRAVIS-SIME, quanta non beneficia ab Illustri tua familia Parentes mei acceperint; quanta non cum benevolentia eos semper exceperit; id enim sine offensa pudoris vestri dicere licet & sine ingrati animi nota omitti non decet.

Hæc eadem benignitas nobis præstita, junctaque cum rara illa & tibi gloriosa in magnanimitate modestia & humilitate, qua omnes admittis sine fastu, sine insolentia, sine supercilio, mihi veniam largitur V. G. ut tanto nomini hæc tanta tenuia adscribam.

Accipe hosce Ingenii nostri conatus tanquam pignora grati animi & indicia devoti pectoris; me tuo favore & benevolentia dignari, assequi velis; nihil non speramus te Patrono; præsidia omnia, auxilia & adjumenta nobis pollicemur, te volente, Galliam petienti mihi tuo præsidio adsis, auctoritate defende, tua humanitate in studiis sis Patronus & auxiliium.

Sic Ornatus favore & clementia tanti Viri, munitus auctoritate magni & clari Legati in Galliis tutus illic securusque versabor, secundabuntur res meæ, optatamque licebit contingere metam.

Sed desino, memor apud quem dicam, & quam breves sermones & scripta apud Principes Viros semper grata decoraque sunt.

Hæc paucula verba tantum adjungimus: Dii te nobis dede-runt, Dii conservent, Dii perpetuent!

*Illustrissimi tui nominis devotissi-  
mus Cultor*

P. V I N K.

# P R Æ F A T I O.



*Um pro more solenni in hac Celeberrima Academia mihi ad promotionis gradum adspiranti quædam esset materies ventilanda, hancce de HEPATE selegi.*

*Rem suscepi arduam, plenam difficultatibus, laboriosam, in qua sic obruor rerum magnitudine & numero, ut magis, quid relinquere debeam, addubitum, quam alii, quid dicturi sint, quærant.*

*Cuncta nitari brevi stylo expolire; non ea movebo, quæ parum ad rem nostram faciunt, vel quæ absque reprehensione negligi possunt; hinc non vaga & libera nimis mea erit dissertatio, nec proluxa firmata Pompa, ut plus sonem quam valeam, sed adductis habenis manebo in hoc gyro; probe sciens a plerisque doctissimis traditum: scriptis congruere, quod nummis, qui eo præstantiores creduntur, quo materia pauciore pretii amplius comprehendunt.*

*Audax propositum, fateor, quodque peritissimum & sagacissimum requireret.*

*Omnis arrogantia odiosa est; hinc nihil dico de meo Ingenio, neque est, quod possum dicere, neque si esset, dicerem; tantum lubet tritum illud & vulgare Proverbium adducere: Audacia sæpè pro Eruditione est & voluisse etiam in magnis magnum est; Respondet itaque hisce Ingenii mei Conatibus aliquis bonus eventus? gaudebo; non respondet? Conatus semper in laude fuit; non placet omnibus? ne perfectissimus quidem; placet paucis? omnem*



# P R Æ F A T I O.

*curae meae fructum retulero si vel uni docto vel prudenti placuerim.*

*Priusquam abrumpo, candide fateor me in hacce Dissertatione sæpius alienos ivisse labores & transtulisse ex aliis in Calamum Chartamque multa tanquam horrea mea, quæque plurimum debeo Magnis illis Præceptoribus, quorum ab ore pependi, quorumque nomen sine honore & religione commemorare nefas puto; principem hic locum meretur Vir Celeb. W. VINK Lector Anatomicus Roterodamensis dignissimus, Patrius meus exoptatissimus, a quo per aliquot annos instructus Celeberrimam hanc Academiam petii, Præceptoresque habui & recensere glorior magna illa Lumina H. BOERHAAVE, H. OOSTERDYK SCHACHT, B. S. ALBINUM, AD. VAN ROYEN, H. D. GAUBIUM, C. 'S GRAVE-SANDE.*

*Magnis hisce viris, quorum mellitam doctrinam itidem per aliquot annos haurire contigit, haud exiguum meae qualiscunque scientiæ Medicæ & Physicæ partem debeo, grataque mente refero.*

DISSERTATIO  
ANATOMICO-MEDICA  
INAUGURALIS

DE

HEPATE.

§. I.



**N**E confusam & vagam, aut desultoriam & interruptam rem agamus ordine inprimis opus est, itaque hac procedamus methodo: ut 1<sup>o</sup>. accurate, & qua valemus Industria succincte Hepatis fabricam Anatomice spectemus, & quidem eo ordine, ut, quæ absque aliqua læsione hujus nobilissimi visceris se oculis & manibus offerunt, primas partes agant, dein spectaturi pulcherrimam structuram interiorē; tūc transibimus considerando partes ipsas contentas Hepatis, & dein paulo fusius & accuratius longe pulcherrimum & præstantissimum usum hujus visceris indagaturi.

§. II. **HEPAR** Etymologicè a Græcorum vocabulo *ἥπαρ* derivatum, credebatur veteribus tale viscus, quod defectui & inopiæ universi corporis succurrat. Jecur Latinis audit, quasi juxta Cor, vel quod æque ac Cor pars est nobilissima.

§. III. Viscus est Infimi Abdominis, maximum totius corporis, coloris ex pallido rubicundi, totum vasculosum, bili conficiendæ præcipue inserviens.

§. IV. Situm obrinet immediate fere sub Diaphragmate; maxima sui parte ex adverso splenis in dextro Hypochondrio, hocce enim ab omni fere parte replet, illicque crassissimum & latissimum est, hinc vadit sinistrorsum, decrescens continuo & gradatim in sua crassitie & latitudine; amplectitur partem ventriculi dextram superiorem & anteriorem, sæpeque ejus orificium sinistrum attingit, imo ad ipsum lienem aliquando extenditur; desinit tandem in subtilem veluti aciem & cunei instar inter ventriculum & superiorem abdominis cavitatem inseritur; inferiori sua crepidine, præsertim crassissimæ ejus partis, infra Costas No-  
thas



thas descendit; quo situ nunc notato omnes cavitates, hiatus &c. alias futuri replentur.

Hocce situ Hepar acquirit locum tutissimum & ipsi commodissimum, etenim maxima ex parte Costarum Notharum muro & Cartilagine Xiphoidae defenditur, hic ventriculus & intestina aliqua instar pulvinaria habet, hic gaudet motu reciproco Diaphragmatis &c.

Sed etiam probe & prudenter notandum esse Medicis hunc situm paucis verbis evincere mihi licitum sit.

Observationes testantur & ipse vidi tumorem elatissimum in parte elatissima dextri Hypochondrii a plurimis Medicis tum dictum Empyema Thoracis, at disrupto postea abscessu ex natura materiae effluentis, aliisque signis & dein cadavere ipso aperto patuit omnibus hunc tumorem verum fuisse Abscessum Epatis, dum Thoracis cavum sanissimum & nulla purulenta materie infectum fuit, hinc clare videmus quam alte sæpe ascendit Epar quasi intra Thoracem; unde Aristoteles deceptus dixit Hepar in Thorace esse situm.

Notavimus sæpe jecur ultra Cartilagine[m] Ensiformem ad ipsum lienem extendi, unde in quibusdam observationibus legimus sæpe tumores in hac parte Hepatis pro ipsis lienis tumoribus fuisse prædictos.

Tandem jecur inferiori sua crepedine infra Costas nothas descendere diximus, unde deceptos multos novimus Medicos, & Observationes testantur, dolores nephriticos dicentes, ubi Hepar ea parte dolebat. Sed hisce desino, aut potius hanc telam in medio adhuc abrumpo, sufficiat me hisce paucis probasse probe & caute notandum esse Medicis verum jecoris situm; nunc pergo & ad instituti nostri partem festino.

§. V. *Figura* jecoris maxime irregularis est illamque debet partibus illis accumbentibus & incumbentibus, quibus inhærere & cedere solet, ad has enim sic se accommodat, ut nihil spatii deficiat vel abundet; hinc manifesta ratio, cur in plerisque animantibus tam varia & diversa reperitur jecoris *Figura*, ob variam scilicet ipsorum dorfi &c. configurationem. Hæce sunt, quæ in genere de *Figura* jecoris dicenda habui, in specie hæcce sequentia nota:

§. VI. Qua parte Hepar Peritonæum vel Diaphragma concavum & politissimum attingit, convexa & politissima est Epatis superficies.

Ubi vero partibus subjectis ventriculo intestinis quibusdam &c. incumbit concava est & valde inæqualis; illa superior, hæc inferior pars Hepatis dicitur; *inferior* hæc pars ad sinistrum ejus latus l'ylorum, ventriculus & omenti quandam portionem obtegit; ad dextrum renem dextrum (unde in crepidine jecur sæpe sinuosum quasi est recipiendo nempe Reni) & Coli quandam portionem &c. attingit.

Inæqualitates illæ & multifariæ & insignes, quæ hic videntur, præsertim ortæ sunt e sinibus & fissuris, quæ illic variæ reperiuntur.

Haud



Haud lubet omnes enumerare, tantum præcipuas hæc quatuor dicimus.

1. Est illa fissura, quæ Hepar quasi in duas dividit partes, quæque vadit a parte inferiori concava sc. & tendit versus anteriorem convexam partem, ubi definit in scissuram plus vel minus profundam.

2. Est ad dextram jecoris partem prope marginem inferiorem, ubi vesica fellis sita est.

3. In superiori parte, ubi progreditur Venâ Cava.

4. Denique ubi Glissonii Capla & vasa communia ingrediuntur.

Cæteri sinus & inæqualitates, vel non semper reperiuntur, vel tantum a partibus vicinis ortæ haud merentur aliquam attentionem.

Eminentes protuberantiæ, quæ in simul hic æruntur, ex eadem ratione paucis tantum meminerimus.

Πυλαὶ veterum, ubi vena, portarum hinc dicta, ingreditur, eminentiæ sunt satis insignes; de Lobulo Spigelii postea mentionem faciemus.

§. VII. Magnitudinem jecoris quidam mensura & pondere describunt, verum contenti nos dicendo ut §. 3. quod maximum sit viscus totius corporis; etenim in diversis ubique diversa cernitur magnitudo Hepatis, nec certa dari potest.

§. VIII. Colore est ex pallido rubicundus; a sanguine forte venæ portarum minus vividi coloris, uti est omnis venosus sanguis.

§. IX. Eximius & præclarus Anatomicus SPIGELIUS divisit Hepar in duas partes, in dextram & sinistram, cum dicit: *Hepar in medio fissuram habet, in quam vena umbilicalis inseritur, a qua in duas partes (quas lobos posthæc semper vocabimus) dirimitur.*

Verum nullo jure hi lobus dici possunt, nisi tantum distinctionis gratia, ut hæ partes, propriis nominibus destitutæ, his insigniantur.

§. X. Idem Spigelius tertium recenset lobum: *Lobus exiguus in cava Hepatis parte juxta portas situs, in ipsam omenti cavitatem totus reconditur, ab aliis Anatomicis nondum descriptus &c.* Plurimi Anatomici hanc tantum protuberantiam vocant, cui illustris Glissonius usus præclaros designavit.

§. XI. Dicimus itaque Hepar in nullos lobos dirimi, cum in cæteris plerisque animantibus in multos distingui lobos observamus; hujus discrepantiæ hæc forte erit ratio: Cætera vel plurima animalia longe flexiliorem præ hominibus habent spinam, unde ipsis commodissimum est Hepar, quod se ad variam spinæ inclinationem movere potest; Hepar itaque in lobos divisum ubique se locare & inserere potest, ergo in iis maximæ necessitatis est hæc divisio in lobos; præterea Hepar ut ventriculum & intestina quædam amplectatur, minori cavitate in homine eget, quam in cæteris animalibus, etenim dorsum hominis latissimum

præ reliquis animantibus est & hinc satis spatii largitur, quo Hepatis moles expansa, ventriculo & intestinis incumbat, at in animalibus reliquis dorsum minus latum necesse fuit, ut jecur iis in lobos dirimatur, quoniam ad fornicis modum super ventriculum & intestina aliqua incurvari debet Hepar.

§. XII. *Nectitur* jecur variis locis, variis modis, variatque sæpe hic nexus, uti varia sunt corpora.

Multi Anatomici multis & diversis modis eum describunt ac depingunt, nos quantum per Anatomen edocti sumus & observare licuit, eum sic delineamus.

Semper jecur Diaphragmati annectitur per *Ligamentum*, quod vocant, *suspensorium*.

Oritur illud a Peritoneo Diaphragma succingente, à quo procedit lato, tenui, sed valido ligaculo, inseriturque toti Hepatis fissuræ magnæ præcipue anteriori oblique transversim, illic videtur, cum duplicatum sit Peritoneum, ab utraque parte extendi & facere membranam Hepatis & Vesicæ felleæ exteriorem, concurrereque videntur ab utroque latere hæ tunicæ & iterum duplicatum fieri peritoneum & formare tum capsam communem Glissonianam; sicque Hepar in duplicatura Peritonei contineretur.

Distrahitur sæpe hocce ligamentum in duo distincta ligacula, in coadjutorium & suspensorium, sed unum & idem est ligamentum, tantum perforatum a Vena Cava, quæ hanc distinctionem quibusdam dedit.

Sæpe idem duplicatum Peritoneum Cartilagini Ensiformi annectitur.

Idem ligamentum amplectitur ipsum ligaculum dictum rotundum limbo anteriori, cum qua etiam oblique descendit & firmiter nectitur lineæ albæ, desinens in parte interiori vaginæ musculi dextri recti abdominis.

Hocce vario nexu ejusdem ligamenti, tot & diversa fuere enumerata ligacula, quæ omnia ex uno eodemque principio nascebantur, uti credo satis liquet.

*Secundum Ligamentum* dicitur *rotundum*, estque tantum superstes vena umbilicalis in fœtu, nunc exsiccata & in ligamentum mutata.

Oritur ex sinu magno Epatis & in umbilicum terminatur.

Varii Physiologi censent illud in adulto homine nulli usui amplius inservire, nec minus Ligamentum fore Epatis.

Verum Barbari populi videntur docuisse quod magni sit usus hocce ligaculum, etenim legitur, si morti crudelissimæ & acerbissimæ dent hominem, tum ipsi umbilicum articulatim secant, hinc resecant, quo  
tum



tum Hepar sursum sensim trahi & posterius cadere dicitur, & miseri hi homines tarda & tristissima morte tandem suffocantur; impedito nimirum libero motu Diaphragmatis &c.

Sicque probabile redderetur hocce rotundum ligamentum non tantum ulum aliquem præstare, verum quasi esse antagonistam suspensorii Ligaculi.

Per duplicaturam horum Ligaculorum myriades vasorum sanguineorum & Lymphaticorum decurrere observantur.

Præter hosce nexus ipsa *membrana exterior Hepatis* sæpe variis modis, variis locis connectitur, sic sæpe Diaphragmati ipsi &c.

Denique inter ligamenta recensent aliqui ipsa *Hepatis vasa*, arterias, venas, nervos; verum multi Physiologi ea nimis tenera & facile disruptentia existimant; quamvis nobis haud adeo absurdum videtur saltem maxima vasa venam sc. portarum, Cavam &c. ut ipsa ligamenta Hepatis considerari posse.

Omnia hæc ligamenta in dextro Epatis latere multo sunt crassiora; hæc pars enim molis & ponderis multo majoris validiora requirit ligacula.

Tandem omnis hicce nexus jecoris cum partibus vicinis tam liber est, ut ad omnem partem & latus se movere possit; & singula illa ligacula inserviunt tantum retinendo Hepar in eo situ, ne ad hoc vel illud latus, vel partem aliquam plus inclinet.

§. XIII. Inter ea quæ absque ulla hujus visceris læsione & oculis & manibus occurrunt (§ 1.) restat tantum *membrana exterior Hepatis*.

Hæc propago Peritonei de Diaphragmate demissa (§. 12.) tenuissima est, nec facile præ tenuitate separari potest, nisi lacerando & dividendo.

Constat duplici Lamella, per quam duplicaturam numerosissima serie decurrunt myriades vasculorum, sanguineorum ac Lymphaticorum; Reptatus Vasorum peculiaris hic est & quidem sicuti in foliis sunt arborum nervuli, ultimæque extremitates tomenti aut gossypii instar tenues.

§. XIV. Absolvi descriptionem illarum partium Anatomicam, quæ absque ulla læsione visceris fieri poterat, nunc ad alteram partem transitum facimus, & nobilissimi hujus visceris interiora spectabimus.

Membrana Hepatis dicta exteriori ablata ilico in conspectum venit ipsa *substantia Hepatis*.

De hac re tot & tam variæ & tam miræ fuere inter Veteres sententiæ ut in Varias & miras opiniones abierint; haud necesse putamus de iis multisque ridiculosis nugis quidquam differere, ad doctrinæ sanioris arcem fugimus.

Maximus Italiæ splendor & Anatomix fidus clarissimum MALPIG-

HIUS introduxit suam Doctrinam de Glandulis, dixitque Hepar esse glandulosum, hancceque doctrinam talibus argumentis & experimentis adstruxerat, ut ab omnes tum temporis amplecterentur; donec tandem Celeb: RUISCHIIUS sui ævi facile Princeps Anatomicus, Vir Candidissimus, hocce Systhema refutavit aperte & nervose, detegens miræ dexteritate per suas Injectiones Hepar totum ex Vasis conflare, quæ ubique ad ultima inter se cohærent & quorum extremitates tam tenues sunt, ut pulposam substantiam constituent; hæ tenuissimæ extremitates microscopio observatæ videntur stellatæ rotunditatis formas induere, impletis sc. felici cum successu Hepatis Vasis; verum aqua maceratum Hepar & conquassatum hæc vasa dissolvuntur, putrescunt & evanescent tenuissima, & tum penicillorum modo quasi disposita videtur hæc pulposa materia &c. Hæcce Sententia Ruischiana.

Hanc litem inter tantos Viros natam haud lubet nostram facere, liceat tantum B. L. binas illas Epistolas allegare, quas laudatus Ruischius & magnus meus Præceptor BOERHAAVIUS de Malpighii Sententia habuere, & quæ de his differuit Celeb. HEISTERUS.

Sed ut, quod sentio, liberius tamen proferam, sententiæ RUISCHIANÆ potissimum me adstrictum dico.

§. XV. Itaque describenda sunt vasa Hepatis. Hæc dividimus in adducta & deferentia. Inter adferentia recenseo Arterias, Venas, Nervos.

§. XVI. Inter arterias primum locum meretur *arteria dicta Hepatica*.

Hæc ex dextro arteriæ celiacæ ramo orta findit se, cum propius ad Hepar accessit, plurimum in duos ramos, quorum alter innumeros fere ramusculos exteriori jecoris, tunicæ largitur & maxima sui parte Vesiculam fellis adit & *cystica arteria* dicitur, alter maximus ipsam Hepatis substantiam ingreditur, etenim postquam glandulis illis plurimum Capsæ Glissonianæ adsitis & quibusdam aliis vicinis partibus furculos quosdam largitus est, Hepatis cavam partem inter Portas ingreditur; ambit 1°. variis ramusculis omnium Vasorum tunicas, ipsumque porum biliarium, & tum etiam simul cum Vena Portarum, quam ubique comitatur & cum qua pari productione in innumeros furculos distrahitur, per totam molem Hepatis ad intima & extima usque dispergitur.

Hæc notabilis arteria est, nec tam exilis ac a quibusdam Anatomicis & describitur & depingitur, sed hi plurimum suas figuras delineavere e brutis præsertim quadrupedibus, in quibus multo minor & exilior præportione ad jecur humanum cernitur, cujus differentiæ rationem dat G. DRAKE in anthropologia sua.

§. XVII. Porro alia quædam arteriosa vasa hic inveniuntur 1°. quæ



a *Vasis Diaphragmaticis* ortum habent & postquam Diaphragmati prospexere ulterius descendunt & per gibbosam Hepatis partem distribuuntur; hæc communicant cum arteria Hepatica; dein multæ aliæ arterioli, quæ ab arteriis per *Ligamentum suspensorium* decurrentibus oriuntur.

Sæpe vel plurimum a *mesenterica superiori* insignis ramus ingreditur Hepar; quem hoc anno coram frequenti auditorum Corona demonstrantem vidi Principem Anatomicum B. S. ALBINUM.

Vidi in præparatis Anatomicis Cl: W. VINK Patru in æternum honorandi multas arteriolas ex mesentericis intrare Hepar.

Præterea a *Peritonæo* huc accedunt rami, qui concavam & convexam Hepatis partem transcendunt.

Denique (uti diximus §. 16.) *Cystica arteria* ipsi Hepati quosdam dat furculos & satis copiosos & conspicuos, quæ per duplicaturam ipsius membranæ exterioris decurrunt, adeo ut videatur, quod jure merito accenseri possent hæ arteriæ Cysticæ Vasis Hepatis communibus, & nequitiam vesiculæ propriis.

§. XVIII. Nunc devenimus ad famosam illam *Venam Portarum*.

Hæc Vena, Portarum dicta, quoniam inter portas Hepatis dictas ingreditur, componitur e plurimis Viscerum Abdominalium Venis, ex Lienis, Ventriculi, Mesenterii, Pancreatis, Omenti &c. &c.

Celeb. Ruischius asseruit se invenisse venas ex Intestinis & Mesenterio abeuntes in Venam Cavam, verum examine accuratius instituto patuit Cl. Virum deceptum fuisse, etenim cum exsiccatum & induratum haberet Mesenterium, cui Vena cava apposita erat, adeo agglutinata fuit hæc Vena mesenterio, ut Venæ quædam meseraicæ viderentur quasi inire hanc Venam cavam; at Mesenterio in Cadavere quavis industria a Cava separato nulla gutta sanguinis effluit, præterquam quod venæ hæ, quas depingit Ruischius, tam capaces & conspicuæ sunt ac ipsæ Venæ meseraicæ, unde vix Anatomicorum oculos effugere potuissent & idcirco has non adesse probabilissimum, si non evictum.

Ad Venam Portarum iterum nos conferimus.

Multi nique Celeberrimi Anatomici hanc venam dividunt in ramos extra & intra jecur & truncum intermedium, sed male, ut cuius facile patet; etenim rami extra jecur siti haud pertinent ad Venam Portarum, sed ad eas partes unde ortum habent, sic Vena Lienalis, ad Lienem, Pancreatica ad Pancreas &c.

Truncus Venæ Portarum ex prædictis Venis constitutus dividit se plerumque in tres ramos, quorum duo ilico intrant Hepatis partem crassissimam; tertius ramus per sinum Hepatis paulisper decurrit, antequam se substantiæ Hepatis inferat.

Hic ramus a continuo impulsu sanguinis latior est factus & quandam sinus formam induxit, unde GLISSONIUS eum pro sinu agnovit. Huic ramo se implantant Vasa umbilicalia in foetu, locoque hujus insertionis e diametro fere opponitur Canalis Venosus, sed hæc in adultis in soliditatem mutata.

Glissonius, qui maxime fovet hunc sinum, addidit ipsi Capsam quandam muscularem, qua putat eodem modo sanguinem ex hoc sinu promoveri per Venæ Portarum ramos & totum Hepar, ac e sinu Lowerriano sanguis magna vi in Cor propellitur.

Sed præterquam quod existimemus hunc ramum tantum quandam sinus formam induisse ab impetu sanguinis distendente latera Canalis, & in plurimis Cadaveribus hanc sinus formam vidimus, in aliis haud adeo clare, vel omnino non reperti sumus, etiam hæc Capsa tantum est productio Peritonæi (§. 12.) & Omenti hoc loco firmior & robustior, nullamque habens contractionem, saltem nunquam fibras musculosas in ea repperi, & vivis animalibus incisis nulla contractio nobis visa est, unde concludimus nec talem sinum vel Capsam obtinere.

Putamus nos hanc Capsulam tantum inservire, quoniam omnia Hepatis vasa in sinu magno ambit & quasi in unum fasciculum colligit, iis firmandis & roborandis scilicet.

In maximis animalibus crassissima est hæc Capsa, & probabile, quod ex his sua descripsit Glissonius; denique illud unicum Glissonio concedimus, quoniam aperte dicit se talem vidisse contractionem, forte quandam similitudinem pulsus posse sentiri a Vasis arteriosis per hanc capsam magna copia dispersis; sed vix quidquam vel potius nihil hæc accelerare poterunt motum liquidorum per Venam Portarum &c.

Hæc vena Port: abit ex trunco in ramos, ex ramis in ramusculos &c. eodem modo ac arteriæ; qualis structura nullibi alias in corpore obtinet; sicque dispergitur ramorum seriebus innumeris per totum Hepar, definitque in multo plures ramos, quam venæ Hepaticæ & simul exiliores, id quod consideratione dignissimum & in functione magni usus est. Hæc vasa & vena portarum & arteria Hepatica &c. extrema sua fasciculatim habent disposita.

§. XIX. *Nervi vasorum adferentium agmen claudunt.*

Oriuntur hi a plexu Hepatico nervi intercostalis &c. intrantque sinum Hepatis maximum, illicque cingunt venam portarum, arteriatu Hepaticam, porum biliarium &c. cumque iis per totam jecoris molem divagantur.

§. XX. *Vasa deferentia sunt 1º. Venæ Hepaticæ.*

Oriuntur hæc e Venæ Portarum & arteriæ Hepaticæ extremis, tantum-



tumque cellulosa membrana connexa continuataque sunt.

Improprie dicuntur Venæ cavæ Rami, cum vasa sint Hepatis propria, uti venæ emulgentes sunt Renum &c.

Principia eorum haud adeo exilia, nec rami ejus tam copiosi sunt ac Venæ Portarum §. 18. extrema; præterquam quod contrario & opposito modo decurrant cum Vena Portarum.

Confluunt hæc Venæ Hepaticæ continuo in majores & majores ramos, donec desinant plerumque in tres, aliquando duos ramos, qui se Venæ Cavæ inserunt. Præterquam quod sæpissime hic plura exiliora vascula simul e jecore cavam ingrediantur. Hæc insertio eo loci fit, ubi hæc Vena se Hepatis postico & superiori margini implantet. Ea-que valde obliqua est, eodem fere modo ac Venæ Cerebri sinus ingediuntur, ususque hujus implantationis obliquæ est, ut sanguis haud regredi posset versus Hepar &c.

§. XXI. Autor quidam nomine SAINT MICHIEL, affirmare voluit quasdam reperiri venas recipientes sanguinem arteria Hepatica advectum, ab opere secretionis superstitem, devehentes illum in Venæ αζυγ partem, quæ sub septo; verum nullus Anatomicus quavis instituta cura & cautela hætenus has demonstrare potuit, & vix credo eas unquam inveniri, cum injectio materiæ ceracæ facta per arteriam Hepaticam ea semper finierit in Venas Hepaticas, vacua manente ipsa Portarum Vena.

§. XXII. Ubi Arteria Hepatica, Vena Portarum &c. desinunt & Venæ Hepaticæ incipiunt & instar penicilli vel fasciculatim hæc vasa se habent, secundum occurrit vas auferens, *Porus Biliarius* dictus; at priusquam de eo differamus, vasa Lymphatica, quæ hic numerosissima serie reperiuntur, describemus.

§. XXIII. Si ligetur Vena portarum & ductus biliarius vel flando in arteriam Hepat: vel ductus biliarios tam numerosa myriadam serie occurrunt hic *vasa Lymphatica*, ut visum pene fugiant.

Distribuuntur hæc vasa per concavam & convexam Hepatis partem præsertim in duplicatura membranæ exterioris.

In convexa Hepatis parte sitæ, uniuntur prope ligamentum suspensorium, illudque quibusdam ramis perreptant & denique ad Chyli receptaculum abeunt.

Quæ in concava ejus parte cernuntur variis ductubus ex Hepatis interioribus prodeuntes, juxta Venam Portarum decurrunt, non nullæ Vesiculam Fellis transcendunt, desinuntque tandem in unam vel plures Glandulas, Venæ Portarum (§. 18.) adlitas, e quibus petunt eandem ac antedicta Chyli Cisternam.

Hæc

Hæ Glandulæ circa ingressum Venæ Portarum phascoli quasi magnitudine reperiuntur, a non nullis Glandulæ Hepaticæ, Venæ Portarum &c. appellantur, vasisque Lymphaticis inservire videntur.

Vasa Lymphatica supra memorata ex ultimis arteriæ Hepaticæ, cysticæ &c. extremis invisibilibus oriuntur.

§. XXIV. *Porus Biliarus* maximus seu ductus Hepaticus constitutus est ex infinitis poris vel meatubus biliferis per totum Hepar dispersis, ortus suos debentibus extremis Venæ Portarum & arteriæ Hepaticæ, eo loci, ubi hæc vasa in venas Hepaticas terminarentur.

Dicti meatus vel pori Venæ formam habent & ex minoribus in majores & majores poros degenerantes tandem in unum maximum desinunt, Porum Biliarium dictum, in cujus cavitate obliqua insertione finiunt, quasi cum valvulæ specie, eodem modo ac Venæ cerebri in sinus longitudinales terminantur.

XXV. Observatu dignissimum est, quod pleraque hæc vasa & arteria Hepatica, & Vena Portarum, & nervi, & Pori Biliari &c. sic per Hepar decurrant, ut ubique ad ultima usque se socient & a ramo ad ramum eandem viam affectent.

§. XXVI. Hepatis fabrica spectata, consideranda venit *Vesiculæ Felleæ structura*. Hæc receptaculum est membranaceum, Figuram Pyri aliquomodo referens, cujus pediculum est meatus Cysticus, bili colligendæ inserviens.

Sita est ad marginem inferiorem concavæ Hepatis partis, illicque sinus quidam est (§. 6.) cujus medio superiori media sui regione connectitur, & inhæret circiter  $\frac{1}{3}$  sui parte. Nexum habet cum hepate 1°. per communem cum eo membranam, (§. 13.) 2°. per vasa sua, quæ itidem cum ipso communia habet (§. 15.) & denique per meatum cysticum; quo Hepatico ductui alligatur.

Magnitudinem dicunt Physiologi parvum ovum Gallinaceum æquare. In duas partes vesicam dividunt & in fundum & collum. Fundus latissima ejus pars est, & nobis erectis quodammodo deorsum ipectat.

Cervix angustissima, elatissima est, & incurvata maxime, incumbitque ventriculo vel Pyloro & Colo, unde plurimum flavedinæ hæ partes inficiantur, & per ipsos musculos abdominales in externa hypochondrii regione aliquando ille flavus color penetret.

Maxime tortuosum est hocce collum, habetque speciem valvulæ, anulum veluti fibrosum, eodem prope modo, ac Pylorus ubi inseritur ven-



ventriculo, dicit Cl. WINSLOW reticulares esse in vesica plicas, præcipue versus collum vesicæ, ubi illæ plicæ longitudinales factæ dein formant speciem parvi pylori plicati.

§. XXVII. Hæc vesica fellea membranaceæ substantiæ constat tunicis quatuor; 1<sup>a</sup>. communis a peritoneo, continuatio est membranæ extimæ jecoris (§. 13.) 2<sup>a</sup>. cellulosa & vasculosa est, constatque omni vasorum genere 3<sup>a</sup>. musculosa, fibrosa est; illæque fibræ duplici ordine decurrere observantur; 1<sup>us</sup>. ordo longitudinalis 2<sup>us</sup>. annularis dicitur; unde unus alium interfecat, ut in vesica etiam urinaria obtinet; verum tam confusi hi ordines hic sunt, ut sæpe ordo dictus non cernatur. 4<sup>a</sup>. Tunica nervosa audit, multis etiam glandulosa; rugosissima hæc est & instar melonis reticulata; maximam habet similitudinem cum crusta villosa ventriculi.

Glandulæ exiguæ, quæ hic numerosa serie cernuntur, figura & magnitudine maxime differunt, verum magnam habent cum intestinorum, Vesicæ urinariæ &c. glandulis conuenientiam.

Sicque nobis videtur hanc membranaceam vesicæ felleæ structuram maxime convenire cum intestinorum fabrica.

§. XXVIII. Vasa habet vesicula fellis ut Hepar & adferentia & deferentia. *Adferentia* sunt 1<sup>o</sup>. *arteria Cystica*, quæ ipsi plurimos dat ramos; 2<sup>o</sup>. ipsa *Hepatica arteria* quosdam largitur furculos; denique *Vena Portarum* dicitur a quibusdam, vesicæ felleæ, qua parte Hepati inhæret, aliquos præbere ramulos &c. *Nervi* qui huc accedunt & inter adferentia recenseri debent, ab eodem ramo ortum habent, qui Hepati datus fuit §. 19. Hæcce vasa arteriosa, præsertim arteria Cystica, terminantur 1<sup>o</sup>. in glandulas, quæ in tunica interiori Cystidis felleæ reperiuntur inter hanc & musculosam tunicam 2<sup>o</sup>. desinunt quædam patulis orificiis in ipsam cavitatem hujus receptaculi & evomunt suum liquidum eodem fere modo, ac in intestinorum plicistalia patula orificia hiant; sed & etiam in venas respondentes suis arteriis finire verissimum &c.

*Deferentia* vasa 1<sup>o</sup>. sunt *Venæ Cysticæ*, quæ incipiunt ubi arteriæ desinunt, vel quæ ex ipso receptaculo felleo probabilissimum absorbent bilem tenuissimam &c. abeunt hæ Venæ minimæ continuo in majores & majores ramos, & inferunt se tandem Venæ Portarum, quamvis Iniectione patuit quosdam etiam inire venam Cavam &c.

*Vasa Lymphatica*, quæ non ex Cystide ipsa prodeunt, sed ex jecore & incumbunt Vesicæ felleæ, desinunt plurimum ad glandulam quandam exiguam Collo Vesicæ adsitam; e qua progredientia Lymphatica cum Hepatis Lymphaticis junguntur, eandemque viam affectant versus Lymphæ ductum maximum, cisternam dictam.

§. XXIX. Porro Anatomico examini supersunt submittendi adhuc

ductus Cysticus, Hepaticus & communis.

*Cysticus ductus* vera est continuatio Colli Vesicæ; etenim initium agnoscit illæ colli parti, ubi valvulæ quædam species (§. 27.) aderat; tortuosissimus est hic canalis & valvulis varii generis instructus; quæ valvulæ hunc ductum non omnino claudunt, sed uti illæ in jejunio aut colo intestino sitæ conniventes se habent. Ubi hic ductus paululum oblique sinistrorsum descendit, coit cum ductu Hepatico, facitque cum ipso angulum acutum, cum ductu autem communi obtusum.

*Ductus ille Hepaticus*, formatus ut §. 24. differuimus, exit ex eodem sinu Hepatis, quem vasa communia plurimum ingrediuntur, tenditque deorsum recta fere via, donec circiter in medio ipsi inseritur ductus cysticus, vel ut Cl. Winslow placet se inserit hic ductus ipsi ductui cystico, & quidem eo modo ac Choledochus ductus duodeno intestino se implantat scilicet quod tum simili modo hic valvulæ quædam species adesset, quæ bilis reditum versus Hepar impediret &c.

Alii affirmant, quoniam ductus Choledochus recta fere via cum Hepatico ductu progreditur, hunc communem ductum tantum continuationem ipsius pori biliarii fore, & circiter tum in medio hujus continuati ductus se inserere ductum Cysticum. Hocce loco ubi coeunt hi ductus Cysticus scilicet & Hepaticus, quædam sinus species a me observata fuit, quæ se haberet eodem modo ac sinus ille Venæ Portarum §. 18. probabilissimum ex eadem causa natus sc. a vi distendente latera ejus.

*Ductus Choledochus* vel communis dictus, quoniam bilem recipit ex utrisque ductibus & Cystico & Hepatico, porro oblique deorsum vadit, donec tandem apponitur intestino duodeno, penetratque tum ipsius tunicam exteriorem, dein inter hanc & alteram oblique descendit, mox perforata & hac inter secundam & tertiam longo itinere progressus, foramine rotundo in cavum intestinorum terminatur, ad initium jejuni intestini; in hoc itinere ipsi sæpe vel plurimum inseritur ductus Pancreaticus; dicunt aliqui hic ad aperturam hanc in intestino, adesse quendam monticulum, qui constaret fibris constringentibus &c. unde bilis vel alius liquidi regurgitatio ex Cavo intestini in ductum Choledochum impediretur &c.

Hi ductus tres differunt maxime in sua capacitate; ductus Hepaticus multo est amplior ductu Cystico, ductus choledochus omnium est capacissimus; Hepaticum ductum pennam anserinam, Cysticum gallinaceam æquare dicunt Anatomici.

§. XXX. En descriptionem Hepatis Anatomicam absolutam, quantum potui accurate, & stylo compendioſo, supersunt nunc alia, juxta ordinem a nobis propositum pertractanda.

Sed id unicum adhuc addere lubet; forte quidam mirabuntur, cur non



non fecerim mentionem ullam, radicum illarum fellearum, ductuum Hepati-cysticorum &c. quibus bilis defertur, juxta plurimos Physio-logos, in vesicam felleam, sed silentii nota hæc omiserim. Paucis dico: has felleas radices &c. raro si unquam in homine inveniri, & plurimos Anatomicos, qui ea describere & delineavere e brutorum corporibus sua inventa protulisse, & denique multos si non omnes de-ceptos fuisse sua opinione, ut aliquos postea haud puduit confiteri, dum se tales radices & ductus cernere videbantur, ubi accuratiori examine instituto postea ipsis patuit manifeste se furculos arteriæ cy-sticæ &c. agnovisse pro hisce ductibus &c.

Itaque cum sentiam hæc omnia, potius nunquam, saltem in homine inveniri, & si unquam inventa sunt, ea esse rarissima.

Quapropter L. B. cum semper brevitati studuimus & tantum ea necessaria tractatu indicavimus hic loci, quæ naturalia semper sunt Hepati, facillime hæc omittere lubuit; præterquam quod existimem, alias esse vias, per quas bilis satis commode & copiose deferri potest & debet in vesiculam; quod ulterius prosequar & argumentis & ex-perimentis evictis & fidelissimis, in usu hujus visceris statim explican-do, evincere conabor.

§. XXXI. Nunc eo me devenisse video, ut, si consulam ordini, quem nobis proposuimus, agendum restet de contentis ipsis Hepatis & vesicæ felleæ, & tum tandem de usu Hepatis fusius differamus. Con-tenta Hepatis 1º. sunt sanguis 2º. bilis 3º. mucosa materia.

§. XXXII. *Sanguinis* naturam, indolem &c. indagare multis verbis haud opus judicamus, etenim hæc ad propositum nostrum perpa-rum facerent, pauca quæ de sanguine necessaria putamus & præsertim de sanguine ad Hepar allato, eo differimus, ubi usum Hepatis ex-plicaturi sumus.

§. XXXIII. Nunc de bile agendum restat; multa profecto, eaque pulcerrima de hac materie dici possent; & deberent, verum nuper de hac re in Dissertatione quapiam Inaugurali tam fuse & ample dictum est, & quæ habuit summus Chemicus GAUBIUS in Lectione quadam publica de hac materie tam fidelissime excerpta sunt, ut eandem cram-ben coquere deberemus; itaque ne Lectori fastidiosus sim, paucis ver-bis hanc amplam materiem absolvam.

§. XXXIV. *Bilis* secreta in Hepate a sanguine Venæ Portarum & arteriæ Hepaticæ modo §. 45. hujus Dissert. explicato, per porum Hepaticum jugi fluore stillans versus intestinum duodenum §. 59. *est hu-mor aliquomodo blandus, dilutus, pellucidus.*

§. XXXV. Quæ bilis vesicam intrat, illic moratur, fit spissior, pro-fundius flava, amarior, nec assiduo fluit in intestina.

*Hæc bilis cystica resistit acescentibus; aliaque, admistione sui, simili facultate imbuit; saponacea est, absterget; olea aquæ miscibilia reddit, resinas, gummi, tenacia quæque, resolvit, attenuat, homogenea facit, si cum his conteritur; nec alcalica est nec acida; sed oleo, sale, spiritibus, inprimis concrevit aqua dilutis; non combustulis, nisi siccata prius; acerrimus humorum circumduktor corporis. Quare effectus ejus, si Chylo, fæcibusque, affusa miscetur, conteriturque, sunt, attenuare, resolvere, abstergere, fibras motrices stimulare, diversissima quæque permiscere, acria salina obtundere, coagulata dividere; vias expedire chylo, appetitum excitare, fermenti vicem gerere, cruda coctis assimilare &c. uti hæc habet. H. BOERHAAVE Instit. Med. §. 99.*

§. XXXVI. Bilis Hepatica dicta §. 34. eadem præstat, ac bilis cystica §. 35. verum Cystica plus, Hepatica minus.

Et hæcce tantum sunt, quæ, de Bile dicenda & adferenda necessario putavi.

§. XXXVII. Denique superest inter contenta Hepatis & Vesicæ felleæ recensenda *mucosa materia* §. 31. Hanc secerni, a vasis arteriosis & glandulis probabilissimum defendendis & lubricandis partibus; verum in Hepate si ulla talis mucosa materia secernatur, perpauca tamen erit, etenim vix ullus hic est attritus & ipsa bilis est materies mucosa blanda; verum in Vesica fellea multæ glandulæ reperiuntur uti §. 27. diximus, & maxime necessaria hic talis est mucosa materia, ob bilis acrimoniam, quæ nimis convelleret hanc nervosam structuram &c. unde illic usus jam indicatos obtinebit &c.

§. XXXIX. Absolvi descriptionem jecoris Anatomicam, nunc ejus usum explicabimus; in hocce indagando maximum laborem & industriam collocavi & ut fateor lubens sed absque ulla arrogantia vel animi superbia, quod quam vile & exile mihi sit, candide dico, forsan quædam haud adeo contemnenda proferam.

Huncce ordinem sequemur (notandum, quod usum Hepatis præcipuum id est secretionem bilis tantum indagabimur) 1°. pro secretionem bilis ejus requisita & ipsa Elementa in Hepate investigemus; dein modum, quo hæc bilis, cujus requisita & Elementa invenimus, secernatur 2°. vias, quibus bilis ex jecore & Vesica defertur, assequemur.

§. XL. *Inter requisita pro secretionem bilis primum locum habere potest tardus motus liquidorum Hepati allatorum.*

Constat retardato motu viscidissimam materiam secerni. Etenim 1°. partes fluidæ ubique longe facilius secedunt a crassioribus: 2°. tardus motus facilius concrescunt partes, motu enim liquida in fluorem servantur, & quo motus tardior, eo magis disponuntur particulæ ad mutuum contactum, id est, condensantur.



Bilis itaque materia tam viscida requirere potest tam tardum motum.

§. XLI. *Sanguis Hepati allatus & bilem secreturus retardato motu per Hepar vehitur.*

Recensebimus tantum ea vasa, postea demonstraturus & Experimentis evicturus hæc bilis secretioni inservire.

*Arteria Hepatica & Vena Portarum, Bilem secernentes*, cum Hepar intrant, adscendunt contra Leges accelerationis, & sic liquidorum motum in ipsis retardant.

2°. Hæc Vasa per Hepar innumeris & exilissimis ramorum seriebus dividuntur; haud oculis assequi possumus arteriæ Hepaticæ innumeras distributiones & exilissima vascula; Vena portarum tam amplum vas in multo minores & plures ramos (§. 18.) quam ipsa vena Cava dividi dixit Ruischius. Constat nunc ubi Diametri Ramorum plurimum superant Diametrum Trunci, ibi tardissimum esse motum, itaque in his Vasis obtinere poterit retardatus liquidorum motus.

3°. Contemplatione nostra dignissima est Venæ portarum structura.

1°. Hæc Vena, ut omnis Venosus sanguis tardius movetur, nullam enim Capsulam muscularem hic statuimus &c. 2°. id singulare habet, quod, priusquam se operi secretionis accingit, plurima abdominis viscera transeat; unde continuo ex truncis in ramos &c. ex arteriis in Venas &c. de motu suo plurimum amisit.

Dixit subtilis KEILIIUS: *crassissimas fieri secretiones ad maximam a Corde distantiam.*

Si vera sit hæc Thesis, fortasse dicent aliqui, cur Hepar Cordi proximum secernat tam viscidam materiem? Verum si tum consideret ex antedictis, viam, quam sanguis Venæ portarum transivit, antequam Hepar intret & bilem secernat, forte hæc tam longa erit & a Corde remota, ac ulla viscida secretio in remotissima parte Corporis.

§ XLII. *Motu hocce retardato (§. 41.) partes fluidæ longe facilius secedunt ubique à crassioribus 2°. disponuntur. particule magis ad mutuum contactum & condensantur liquida, quod secretioni Bilis maxime proficuum.*

Etenim sanguis Venæ portarum parte sua Lymphatica ubique spoliatus fuit in Ventriculo, Intestinis, Pancreate &c. & relictus sanguis crassius.

In Hepate innumera (§. 23.) vasa Lymphatica conspiciuntur, quod profecto sic a natura factum, ut sanguis Arteriæ Hepaticæ attenuatissimus & dilutissimus, parte sua Lymphatica maxime tenui spoliaretur & sic sanguis crassior supersit secretioni Bilis.

Facillime evictu quod sanguis in arteria Hepatica & Vena Portarum contentus, facilius mutuo contactu potuit incrassari, tardo sc. hocce motu &c.

§. XLIII. *Elementa ipsa Bilis in sanguine Arteriæ Hepaticæ & Venæ Portarum continentur.*

*Sanguis Arteriæ Hepaticæ* ejusdem naturæ est, ac e quo secretum fuit Cerumen aurium, tam proximum, ut dicunt, naturæ bilis; ab arteriis omne oleum in Cellulosa tunica colligitur; ab ipsa arteria Cystica, concedunt aliqui, bilem in ipsa vesica Fellea secerni; etenim habet arteria Hepatica omnes proprietates, e quibus bilis secerni potest, constat enim ex aqua, sale, oleo & terra ut omnis sanguis arteriosus: dicit Listerus in Tractatu de Humoribus quod in plurium generum avibus aliquando ipsa bilis naturaliter generari solet in iisdem officinis, quibus sudor colligitur. &c.

*Venæ Portarum sanguis* e diversi generis liquidis constat. 1°. enim accipit Vena Portarum sanguinem Venosum a *textura Ventriculi* per venas brevès, Gastro-Epiploicam sinistram, Gastricam majorem, Gastro-Epiploicam dextram & Venam Pyloricam; Hæ Venæ continent sanguinem, e quo secretus fuit humor Gastricus, sed forte secum reducere subtilissimum, spirituosissimum contentorum, resorptum a vasculis illis revehentibus, quæ in cavo Ventriculi fundo tam innumerabilia sunt, 2°. ab *Epiploicis* vehentibus sanguinem residuum a secretionem olei vel adipis in Omenti ductibus adiposis, qui in Ranis in Venas has hiant. Sed probabile, quod hic simul resorbeatur vapor ille tenuissimus exhalans in Abdomine; qui vapor cum oleo Omenti per moram, calorem, continuum motum & attritum summam attenuationem & dispositionem ad rancedinem acquirit; 3°. ex *Pancreate* exiles ramuli & *hæmorrhoidalis* interna huc ferunt suum sanguinem; a Pancreate sanguis crassus, omni Lympha ferè orbatus; ex hæmorrhoidali interna sanguis acris forte aliquomodo; etenim sanguis ab intestinis crassis, in quibus hærent fæces putrescentes, ortus, absorpsit forte qualdam partes volatiles, putridas. 4°. omnis etiam sanguis qui in Mesenterium & ad Intestina advectus erat ope arteriæ mesentericæ superioris & inferioris & illic suo perfunctus munere in Venas Mesentericas rediit; hæ quidem deferunt sanguinem, qui secrevit liquorem Gastricum, sed etiam partes Chyli subtilissimas forte reduxit; præterea probabilissimum, dicunt aliqui, ipsam bilem aliquatenus per has Venas resorberi, unde continua fieret Circulatio ejusdem bilis; tandem cur hic non pinguedinis Mesenterii usus idem esse possit, ac Omenti pro Vena Portarum? videlicet, ut sanguini per suas Mesentericas Venas ab intestinis ad Hepar adscendenti multas in transitu ex iis, quibus copiose adornatur, adiposis Cellulis, particulas oleosas ob eandem causam admisceat. 5°. Vena Cystica & adfert suum sanguinem; probabilissimum est, quod Venæ bibulæ positæ in Cystide Fellea resorbent partem bilis fluidissimam, dum mora residuum concrefcit & crassescit; 6°. denique agmen claudit Vena Liénalis, continens sanguinem, fluidum, solutum, spiritulos scatementem.

En



En hæc sunt L. B. ipsa bilis rudimenta, abundans sanguis oleo, Lymphæ, Spiritu &c. quæ in Venæ portarum trunco &c. levem adquire videtur inclinationem in putredinem.

§. XLIV. *Tandem Hepar sua fabrica sic constitutum est, ut bilem & non alium liquorem secernat.* Observavit Celeb. RUISCHIUS, quod ubique in corpore, ubi diversa fit secretio, diversa sit vasorum divaricatio, & præsertim ad extrema sua, hinc in Renalibus vasis alius observatur decursus, in Cerebro alius, alius in Testibus &c. & quoniam sapientissimus Deus nihil creavit frustra, concludit varias inde ubique fieri secretiones.

Nec certe absque ulla ratione; probat vir ille diligentissimus & Naturæ Conditorum peritissimus, ex analogia suam Thesin; cum miro artificio vasa conspicienda præbuit, fructuum diversorum, & in varii saporis & indolis fructibus ea semper varia deprehendit.

Per Anatomen Pyri ejusque vascula examinando dixit maximam convenientiam cum Hepatis vasis. An per hanc similitudinem Pyri & Hepatis vasorum inter hæc quidquam argumentari liceat, aliis indulgentioribus relinquo.

Sufficiat probasse variam secretionem a vario vasorum decursu dependere posse. In Hepate vasa fecernentia fasciculatim (§. 22.) diximus sunt disposita & penicillorum modo. Pauca hæc sufficiant pro bilis secretionem a varia Organi structura. Nunc modum, quo bilis in jecore secernitur, indagabimur:

§. XLV. *Arteria Hepatica & Vena Portarum secernunt bilem in Hepatis poris dictis biliariis* (§. 24.) Sanguis arteriæ Hepat. & Venæ Port. continens ut §. 43. ipsa bilis rudimenta per Hepar distribuitur vi sanguinis a tergo urgentis, constrictione vasis arteriosi, motu reciproco Diaphragmatis (§. 4.) partium vicinarum &c., propulsusque per tenuissimas vasorum series ad extremitates usque pulpofas, illic tria genera humorum a se secernit; quales sunt biliosi, forte Lymphatici & sanguis venosus; biliosæ particulæ ductus biliarios, Lymphaticæ vasa Lymphatica, & sanguis residuus venas hepaticas ingrediuntur.

§. XLVI. *Ratio & experimenta docent per dicta vasa (§. 45.) dicto modo bilem secerni.*

Haud multis verbis egeo, quibus ratione evincam Venam Portarum aptissimam esse bili secernendæ, ejus fabrica, motus humorum &c. satis ni fallor evincunt (§. 18. 41. &c.) id &c. Injectio materiæ ceræ in hanc venam docuit terminari ipsam in poros biliarios & ex his in ductum Hepaticum; sed desino hancce rem ulterius urgere, cum neminem novi, qui hæc in dubium vocabit. Suspicio potius multos fore; qui me asserentem de arteriæ Hepaticæ tam nobili usu in-

invadere conabuntur, cum plurimi Physiologi huic arteriæ tantum nutritionis opus offerunt, sed absque ulla temeritate & ingenii audacia auxilio irrefragibilium argumentorum & fidelium experimentorum, evincam omnibus hancce arteriam bilem ipsam secernere, & forte majori copia, quam quis credat.

Sic itaque sine pluribus ambagibus progredior.

1. Nemo credo, inficias ibit in sanguine arterioso non contineri omnes dotes bili secernendæ aptas & arteriam Hepaticam huic operi idoneam.

2. Diximus §. 18. extremitates arteriæ Hepaticæ easdem ac Venæ Portarum, sed hinc §. 44. secretio bilis magna ex parte dependebat; cur itaque non æque arteria Hepatica ac Vena Portarum, ex hac lege sc., bilem conficeret?

3. Adstruimus ipsam secretionem bilis per arteriam Hepaticam ex ejus vasis magnitudine; cum Listero enim dicimus hanc pennam anserinam magnitudine æquare, &c. an itaque tanta arteria soli jecoris nutritioni ut multi dicunt? Hepar est viscus tantum vasis constans, hinc pauca nutritione eget; an non ex sola arteriolarum propagatione per jecoris vasorum tunicas nutritio sufficienti copia fieri posset? vel mavis cum reliqui corporis Oeconomia convenire, aliæ adhuc arteriæ sunt nutriendæ; illæ scilicet quæ a Diaphragmate (§. 17.) Ligamento suspensorio, Peritoneo, Mesenterio, vasis cysticis ad hepar accedunt, & per ejus superficiem distribuuntur, & sic intrant, uti arteriæ nutriendæ solent; profecto hæc satis nutritioni inservient, dum arteria Hepatica secernat bilem; vel tandem sint quidam tami ipsius arteriæ Hepaticæ, cur non alii secretioni? scilicet eodem modo, ac arteria emulgens in Renibus quosdam dat ramos nutritioni, alios secretioni, uti id in pluribus visceribus obtinet; verum probabilissimum vasa antedicta tam numerosa serie hic præsentia, ubi tamen pauca nutritione eget jecur, nutrire Hepar; præsertim vasa cystica, quæ rami sunt ipsius arteriæ Hepaticæ & simul per Hepar disperguntur quadam copia (§. 16.) eo modo uti vasa nutrientia solent, unde hæc nutritio & secretio cum reliqui corporis Oeconomia convenire videtur.

4. Lubet hancce meam sententiam comparatione quadam ad aliud viscus clariorem & firmiorem reddere. Considerate quæso pulmones, quanta viscera! cernite arteriam bronchialeam quam exilem; videte quis usus sit hujus arteriæ: nutrit viscus, quod tanta nutritione eget, sed haud nutrit solum, sed excernit præterea mucum continuo in tanta copia &c. Cur itaque non ex arteria Hepatica tanto majori, licet etiam nutritioni servire dicatur (quod tamen haud necesse ob dictas rationes) bilis secernatur? Profecto in pulmonibus major nutritio requiritur, dum nutritionem semper proportionalem fieri



detritioni lex est perpetua; itaque pulmonibus, si soli tantum nutritioni arteria Hepatica inserviret, juxta hanc legem & ex analogia multo major arteria concessa fuisset.

Plura eaque non minus ponderosa adferre argumenta possemus, nisi hæc sufficientia sciamus, & propositum nostrum, singula, quantum possemus, brevibus amplecti, vetet.

Ratione itaque comprobata hæc mea Thesis est, nunc Experimentis evincere conabor:

6. Si injiciatur per arteriam Hepaticam vel materia aliqua ceracea, vel aqua lacte mista definet ea in ipsos poros biliarios & tandem in ductum Hepaticum, Venis Hepaticis sæpe inde nullo modo repletis, multo minus Vena Portarum; uti sæpius hocce Experimentum institui, & eo modo successit eventus.

Multi iique Celeberrimi Anatomici injecere eodem modo, sed non pari successu, hanc arteriam; quidem transivit materies injecta poros biliarios &c. sed simul repletæ inde erant Venæ Hepaticæ, & Vena Portarum; unde suspicati sunt 1<sup>o</sup>. repleri Venas Hepaticas, ex his in Venam Portarum transire materiam, & hinc tandem in porum biliarium; sed quod tantum hæc thesis nitatur alicui ratiocinio, non veris Experimentis nemo negabit; etenim dicunt se maximam vim debuisse adhibere, si per arteriam Hepaticam eousque materiem urgere conati fuerint, &c. qua vi putant hæc vasa tantum repleri &c. quod facile credo; verum si minorem instituisent, forte Venæ Hepaticæ & Portarum Vena, haud repletæ fuissent, sed tantum pori biliarii &c. saltem sæpius expertus sum & candide fateor me minorem semper adhibuisse vim injiciendo arteriam Hepaticam quam Venam Portarum; nec mirum adeo; etenim præ subtilitate ultimorum ramusculorum Arteriæ Hepaticæ magna quidem nascitur materiæ injectæ resistantia, sed in Venæ Portarum extremitatibus tenuissimis, plerumque sanguis condensatus hæret, qui haud minus incommodum injectioni adfert & sæpius me frustravit a felici successu, quo certus essem Venam Portarum secernere bilem; hinc per aliquod tempus in ea fui opinione, ut Vena Portarum nihil ad secretionis opus conferret & sola tantum arteria Hepatica id perageret; & profecto haud adeo contemnendis argumentis instructus fui; sed denique successit Experimentum aliquod & vidi cum arteria Venam secernere bilem; uix scio quidquam dubii nunc restare; illud unicum lubet addere: forte quidam putarent, injectione hac arterias Cysticas simul repletas fuisse & sic has extillasse suum liquidum in vesicam felleam & exinde ex communicatione quadam, quam fingerent, in ipsum Hepar & porum biliarium devenisse; sed præterquam quod levis momenti sit hæc

ratione, etiam ligavimus has arterias, & tum per solam arteriam Hepaticam injectio facta eodem modo successit eventus.

§. XLVII. Ratione itaque & Experimentis hæc mea Thesis probata & evicta, cui usui sit superesset dicendum; scilicet cur non sola arteria Hepatica vel Vena Portarum secretionis opus conficeret, & hic tale duplex quasi Organum sit? Sed sufficiat, L. B. me veritatem utriusque hujus secretionis evicisse, usum nunc aliorum curæ & sagacitati relinquo; Absolutis iis, quæ ad secretionem bilis per arteriam Hepaticam & Venam Portarum (§. 45.) pertinent, juxta ordinem nostrum restant viæ examinandæ, per quas bilis e jecore & vesica deferitur.

§. XLVIII. *Bilis secreta & nunc (§. 46.) in ductu Hepatico contenta naturaliter ex eo deferitur in ductum Choledochum & inde in Duodenum intestinum vel jejuni principium.*

Porus Hepaticus recta fere via deorsum tendit, unde liquidum in ipso contentum, propria sua gravitate & propulsione simul liquidi incumbentis & affluentis, descendere debet; ductus Choledochus recta fere via cum Hepatico ductu progreditur & descendendo in Duodenum intestinum inferitur, ubi patulo orificio hiat in jejuni principium, unde ex eadem ratione bilis e ductu Hepatico in Choledochum, & ex eo tandem in Duodenum intestinum vel jejuni principium naturaliter deferri debet. Notandum, quod ubique supponemus corpus erectum pedibus.

XLIX. *Experimenta docent bilem e ductu Hepatico in Choledochum & ex eo in intestinum dictum profluere.*

Etenim ligato ductu cystico bilem versus intestina eo tempore tamen affluere cernimus, sed alia tum non datur via, quam per dictos ductus, ergo per hos meare bilem versus intestina certissimum. Nimis evidens hæc res est, quam quod alia & prolixiori egeat explicatione.

§. L. *Hicce bilis in intestinum fluxus a variis causis minui vel impedi potest.*

Etenim a partibus vicinis tumentibus, vel ipsis intestinis repletis, compressa & distenta intestina, comprimuntur & coarctantur vel clauduntur ductus Choledochi insertio inter intestini tunicas, unde bili effluxuræ obex ponitur &c.

Sed haud lubet multum his immorari, determinare enim non possumus hæc impedimenta bilis profluxui intra intestinum, ad certiora & continuo præsentia transitum facimus.

§. LI. *Fibris illis tunice musculosæ intestinorum contractis, ubi inferitur ductus Choledochus, necessario impeditur profluxus bilis intra intestinum.*

Diximus (§. 29.) insertionem ductus Choledochi fieri obliqua valde  
via



via inter intestini tunicas, hinc tunica ipsius musculari constricta contractum intestinum coarctatur etiam vel clauditur apertura ductus Choledochi inserti, quæ ex se angustissima est & naturaliter connivere semper conatur, unde bilis effluere nequit in intestinum vel saltem impedimentum nascitur.

§. LII. *Hanc tunicæ musculosæ intestinorum contractionem statim subsequitur ejus relaxatio, hique ambo motus continuo & alternatim fiunt, unde liquet manifeste, bilem tempore, quo relaxantur fibræ musculosæ, influere posse intestinum, tempore vero contractionis, impediri.*

Nulla explicatione eget hæc propositio, e superioribus satis liquet ejus veritas.

§. LIII. *Bilem itaque non continuo fluere e ductu Hepatico per Choledochum in intestina putamus.*

Præcedens §, ni fallor id evincit.

§. LIV. *Bilis cum effluere nequeat in Duodenum vel jejuni intestini principium, regurgitatur; hæcceque regurgitatio fit e ductu Choledochi in Cysticum & ex eo in Vesiculam Fellis.*

Bilis hæc effluere nequeans ob contractum intestinum & hinc clausum vel coarctatum foramen conatur regurgitare, uti omnium liquidorum natura est, simul per vim contractionis adjuvatur hæc regurgitatio & repellitur aliquomodo bilis; 2°. Hydraulicis notum est, quod omne liquidum in Canali pleno premat præcise Latera & fundum sui Canalis, ac sunt puncta altitudinis; itaque si Canalis biliferi basis ponitur ad locum illum, ubi intestino Duodeno apponitur Choledochus ductus, tum pressio fluidi eo contenti erit ut ductus hujus altitudo; si bilis effluere nequit, quasi inter duo prela ponetur, tantum enim basis reprimet, quantum est pressio altitudinis; itaque in hoc casu subsistet; sed tertius est Canalis, qui ductus Cysticus est & vix ulla illic resistentia, saltem non talis quæ superare valet resistentiam a parte intestini, ergo hunc intrabit; valvulæ enim hic positæ vix ulli sunt obstaculo, etenim nec arcte claudunt §. 29. & potius egressum quam ingressum impediunt. Ex ductu Cystico facilis via in Vesicam felleam, Valvula enim ad Collum Vesicæ posita haud resistit & ibidem potius egressum quam ingressum retardat &c. Alia non datur via, nisi quis ductum Hepaticum dixerit, verum illic multo majus est obstaculum quam Cystici Ductus; etenim 1°. continuus affluxus bilis resistens regurgitationi 2°. Valvulæ illius species, quam Cl. Winslow (§. 27.) dixit adesse ad insertionem ductus Hepatici in Cysticum, qua Valvula impediretur regressus bilis e Choledochi in Hepaticum ductum.

Itaque bilis regurgitata naturaliter e ductu Choledochi in Cysticum

& hinc in Vesicam felleam transibit.

§. LV. *Experimenta evincunt e ductu Choledochi bilem regurgitare in Cysticum ductum & Vesiculam Fellis.*

Lubet duo hic adferre Experimenta, quæ Cl. Bohnius habet in actis Lipsiensibus, quæ sic se habent: *Canis vivi præsentibus pluribus spectantibus dilaceravi Vesiculam usque ad Cervicem, tentaturus an aliquid bilis per hanc versus fundum laceratum deflueret, Respondebat expectationi eventus, id est non tantum bilis quasi turgescencia quadam ex angustiori ductu Cystico per latiore Cervicem copiosissime eructabatur, sed idem Cysticus post Injectum ipsi Vinculum, notabiliter sic intumescibat, ut nihil vel parum saltem bilis per dictam Cervicem amplius promanaret.*

2<sup>um</sup>. Experimentum est: *Aperto vivi Canis abdomine, ex Vesicula biliaria omnem expressi hujus humorem, ligavi ductum cysticum, expectaturus an nihilominus, si subjectum aliquamdiu superstes foret, aliquid bilis, non obstante hoc vinculo, denegatoque folliculo fellis cum poro Epatico commercio, in illo colligeretur, proin consuto denuo abdomine animal per 24. horas vivum conservavi, vivumque resecai; & per ductum equidem Choledochum bilis ad intestina confluere videbatur, præter modum tamen insimul tumente extremitate Canalis Cystici filo intercepta; nihil autem fellis, sed loco hujus tantillum sanguinis congrumati & sapore amaricante, sine dubio a bilis expressæ reliquiis, tincti deprehendebam; quo sane Experimento in eò confirmatus fui in Cane, homine similibusque animalibus, quibus Pori Hepatici & Cystici adæquata contingit communicatio, notabilem bilis quantitatem ab Epatico ad Cystin per hujus meatum secedere, adeoque ex hac bilem ad intestinum non continuo sed interpolato motu ferri &c.*

Diximus §. 29. quandam sinus formam adesse, ubi utrique hi ductus coeunt; quod magis affirmare videtur explicatam a nobis regurgitationem, etenim bilis regurgitata ad illum locum, ubi ductus hepaticus recta fere via cum Choledochi continuatur, maximam resistantiam invenit, nequeens intrare Epaticum ductum ob causas antedictas, unde distenta latera hunc sinum formavere &c.

§. LVI. *Hæc Bilis, ut nunc ratione & Experimentis evincere conati sumus, regurgitata in Vesicam Felleam, ratione quantitatis, quandam mensuram vel proportionem habere videtur ad bilem in intestina profluentem §. 48.*

Diximus §. 50. motum intestinorum peristalticum esse vim contrahentem & relaxantem tunicas intestinorum, & contractione hac bilis effluxum in intestina impediri, laxatis vero tunicis iterum effluere posse bilem in intestina, itaque reciproce fieri hos fluxus nunc regurgitari bilem versus vesicam felleam nunc inire intestinum, hæc tamen exceptio-



tionem, ut tempore, quo bilis e Vesica expellitur nullam hanc intrare credendum sit.

Hic reciprocus motus, uti reciproca est actio intestinorum fieri iisdem temporibus constat, etenim hæc quasi Systole intestinorum est ut ipsorum Diastole, & vice versa.

Unde forte probabile similem obtinere proportionem in bile regurgitata & effluente in intestinum, ratione quantitatis scilicet.

An vero causæ aliæ sunt quæ plus retardant vel accelerant &c. motum alterius? & hinc copiam bilis regurgitatam & effluentem disparem reddunt?

§. LVII. *Vesicam Fellis per hanc regurgitationem solam impleri multa docent.*

Nemo, suspicor, dubitabit hac regurgitatione Vesiculam Felleam sufficienti bilis copia continuo impleri posse; quid opus itaque, ad alias vias confugere? cui necessitati nunc Radices felleæ, ductus Cystico-Hepatici &c. a Variis Physiologis, iisque Celeberrimis, producti &c.

Hos ductus &c. rarissimos in homine si ullos inveniri cum Cl. Heistero ratione asseruimus §. 30.

Et si ex Analogia ratiocinari liceat vel lubeat multa adferre possemus, quæ magis adstruerent nostram sententiam; sc. in Variis animalibus deesse folliculum fellis Hepati adnatum, sed multo intervallo ab Hepate inveniri appendices sacciformes, munus vesicæ felleæ implentes, quæ sc. per Canalem Cystico-analogum e poro biliario, absque ulla Hepatici visceris communicatione succum biliarem, ex quo turgabant, accipiunt &c.

Sed nec his immoramur; tantum producimus hic ipsa Experimenta Cl. Bohnii §. 60. hujus Dissertat. allegata, ubi inter alia hæcce leguntur: *folliculo fellis in Cane vivo, expresso omni ejus humore prius, tum ligato ductu Cystico per 24. horas, nihil bilis in eo collectum fuisse &c. deprehensum est.*

J. F. Ortlobius plura adfert Experimenta, quæ brevitati studentes omittimus producere.

Sed Jure quis inquireret, num crederem, per tunicam ipsam Cystidis perque glandulas illic positas nihil bilis secerni?

1. Necessitatem nullam videmus, cur hoc fieret?

2. Nec fabrica docere id videtur, etenim eandem fere structuram Vesicæ felleæ videmus ac intestinorum, eodem fere modo vasa sunt disposita, glandulæque fere eadem sunt, ac in intestinis, in Vesica Urinaria &c. inveniuntur, cur si fabrica fere eadem, usus hic tam alienus foret?

Sed de Glandulis hisce observare licet, eas paucissimas inveniri in

Fundo Vesicæ, plurimas in Collo, innumeras in ductu Cystico & communi; e qua dispositione & situ forte alia & magis probata de hisce opinio haberi posset & ad scopum nostrum & usum commodissima & utilissima.

Si enim, qui hisce Glandulis bilem aliquam secerni putant, dicunt, si mucus hic excerneretur, vel obesset hic expulsi bilis e Vesica, cum scilicet nullus tum esset stimulus, qui valeret excitare & irritare tunicam interiorem vesicæ obductam tali smegmate; vel ajunt bilis acrimonia incideret hunc mucum & tum nulli usui foret &c.

Sed patet nunc hasce paucissimas glandulas, quæ in fundo vesicæ conspiciuntur, non adeo obducere posse smegmate hanc nervosam tunicam, quin acrimonia bilis illic tantum præsens eam irritare & convellere adhuc posset; sufficiant eæ solummodo, vel forte temperandæ bilis acrimoniæ, vel impediendo, ne bilis sua acrimonia citius quam par sit hanc nervosam texturam irritet & sic bilis excretionem promoveat.

Ad Collum vero vesicæ plurimæ glandulæ sitæ illic nec impedimento sunt bili, quo vesica stimulo careret, etenim vix unquam vel nunquam eo adscendit bilis in vesica; & illa, quæ transit bilis e Cystico ductu, mitissima est, nec etiam hinc per acrimoniam bilis adeo incidetur; idem de ductu Cystico & Choledochu dicimus.

Verum usum itaque harum glandularum ad Collum vesicæ, ductum Cysticum &c. locatarum dicimus, tantum fore, ne bilis tam acris & penetrans e fellis receptaculo expulsa, partes, quas transire debet, sua acredine nimis convellat, sicque Collum vesicæ, ductum Cysticum & communem constringat, coarctet, vel peritus claudat, unde bilis effluere nequeans pessima producere posset symptomata; quod nunc præcavit smegma illud a sapienti natura hic productum tam necessario usui &c.

3. Examini nostro submisimus bilem Hepaticam & vesicæ Felleæ; quanta cum cura & prudentia valuimus, bilem Hepaticam e Cane vivo collegimus, in vitro firmissime clauso conservavimus, & naturam imitando in eodem fere calore, ac in corpore humano naturalis est, retinimus, vidimus successive easdem mutationes fere, ac in bile vesicaria observare possumus.

4. Mera est hypothesis afferentium bilem hisce glandulis secerni, nullis enim Experimentis Thesin suam probant vel probare valent.

Ex his omnibus concludo potissimum nullam bilem in vesica biliaria contineri, ac quæ regurgitatione §. 59. in eam delata est; saltem multa docent.

§. LVIII. *Vesica itaque Fellea inservit pro Receptaculo bilis.*



Cl. Bohnius ait bilem hic eousque morari, donec Chylus ad intestinā secedat, & simul eadem bilis acrimoniam & activitatem majorem contrahat, particulis ejusdem aqueis aliquomodo exhalantibus, ratione cujus vim suam potentius in Chylum exercere queat &c.

§. LIX. *Vesicula fellis ad quandam sui distantiam repleta, necessario evacuatur.*

Etenim cum Cystis eousque repletur, ut cervix resistere nequeat pressioni bilis, ea dilatata necessario evacuabitur, verum an unquam ex sola tali repletionē exinanitur Vesica Fellis? Verum eo usque impleta Vesica, ut bilem ad aliquam sui rigiditatem ac distensionem proportionatam admittat, tum effluere bilem, vel irritari tunicas vesicæ & eo bilem expelli, valde probabile: scilicet cum Elasticitas tunicarum resistens momentis distendentibus sit sit æqualis &c. tum enim expellitur bilis e Vesica; sed & hac distensione fibræ elasticæ quendam motum spasmodicum acquirere possunt, quo contracta Vesica plurima bilis ejicitur.

§. LX. *Sed & bilis sua acrimonia irritando tunicas vesicæ expelletur; quod & fieri posse nemo negabit, adeoque haud opus multis probare.*

§. LXI. *Denique pressione partium vicinarum compressa & coarctata Vesica facillime bilem ex ea eruētari posse & debere certissimum est.*

Singulæ Vicinæ partes id facere valent, sed præsertim ventriculus ipsi proximus, hic enim ab ingestis tumens & extentus necessario comprimit Vesicam & pro compressionis gradu bilem e Vesica expellit; duratque hæc compressio, donec plurima ingesta in ventriculo & intestinis contenta digesta & excreta sunt.

§. LXII. *Hicque modus §. 66. expellendi bilem e Vesica nobis maxime naturalis, utilissimus & necessarius videtur.*

Naturalis videtur modus, quod & ex prioribus satis evincitur & quoniam in jejulantibus Vesica fellea plurimum plena invenitur, magis affirmatur; *utilissimus vero & necessarius est*, quod patet clare ex usu hujus bilis cysticæ §. 35. ubi hanc & coctioni, digestioni & excretioni &c. Ingestorum interservire diximus; itaque hoc tempore cum ventriculus & intestina iis tumeant, ejus præsentia maxime requiritur; ad fungendum itaque suum munus ab his visceribus, ipsius ope indigentibus, tanquam sedulis monitoribus excitatur.

§. LXIII. *Hac expulsionē omne contentum e Vesica fellea expelli nequit, sed quæ effluit transeundo collum Vesicæ, progreditur per ductum cysticum in Choledochum & hinc in Intestinum, nec magna vi vel impulsu ad id opus est.*

Primum, scilicet haud depleri posse Vesicam in statu sano ad ultimum contentum usque evincit fabrica partis &c. progredique bilem dicto modo

modo versus intestinum & in ipsum nihil est quod obstat, vel impediat, nulli datur resistentia vel talis, quæ par est pressioni & impetui bilis profluentis; præterquam quod ipse Glissonius testetur minima Vesicæ per manum compressionem bilem versus & in intestina profluere.

§. LXV. Plura possem, plura forte deberem de hac nobilissima materie dicere; sed hisce contentus abrumpo hic; habetis L. B. quæ pro Ingenii nostri mediocritate, iudicii tenuitate, temporis angustia, qua pressi fuimus, ad lubitum fuit hunc in manipulum convolvere; in his, si quid bene & non e trivio sumtum dixerim, gratia aliqua esto, si aliter & humani quid passus fuerim, scias me ut te hominem.

F I N I S.

